## What you keep hidden.

It's practically compulsory nowadays to have a "bubbly personality" unless you want to become a social pariah. Myself, I've always preferred "still waters".

I'm shair I'm no the only yin That's thought the same o you. Ye keep mair hidden deep within Than what's on public view.

Ye keep sae quiet an canny-like, An nuthin ye reveal; Juist as folk hae a hedge or dyke, A gairden tae conceal.

Gairden or graveyaird? Whae can tell! It's nane o ma affair.
Yet, still I wonder tae masel
What you keep hidden there.

But yin fine day, some hero braw Will make ye chainge yer tune; Wi a ledder tae sneak ower the wa, Or a tank tae caw it doon.

I'm shair I'm no the only yin That's thought the same o you: What you keep hidden deep within Is worth a verse or two.